

Date – 26/08/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Larsap General (Rtd) Vijay Kumar Singh hmalaknain Mizoram State Cancer Institute-a hman tur Cancer Screening Test Kit 3,875 chu USA atangin a thlawna dawn a ni.
2. Assembly Session neih laiah nimin khan halpuah leh halmawi khapna tur 'The Mizoram Regulation of Fireworks Bill, 2026' chu pawm a ni.
3. Assembly Session kal mekah Tawi Bialtu MLA Prof. Lalnilawma chuan a bial chhunga “Artuia Intodelhna tur Bana Kaih Project” kalpui mek atanga, a bial mipuite thar artui chu vawiin khan MLA te a thartem a ni.
4. Council of Scientific and Industrial Research-National Aerospace Laboratories(CSIR-NAL) chuan tualchhung siam chi micro leh small gas turbine engine chi thum a tlangzarh.

<><><>

GOVERNOR

Larsap General (Rtd) Vijay Kumar Singh hmalaknain Mizoram State Cancer Institute-a hman tur Cancer Screening Test Kit 3,875 chu USA atangin a thlawna dawn a ni.

Cancer Screening Test Kit hi Zemabawka Mizoram State Cancer Institute (MSCI) a hman tur a ni a. Test Kit-te hi Larsap hmelhriat USA-a awm, Dr. Dahiya leh Dr. Chauhan ten an rawn pek a ni.

Larsap General (Rts) Vijay Kumar Singh chuan mipuite hriselna chu State hmasawn nana pawimawh hmasa a nih thu sawiin, cancer tamna leh thihpui tamna State nih chu veiawm a tih thu a sawi a. Cancer hmuhchhuah hmaa enkawlina tha pek chu thil pawimawh tak a nih thu sawiin, USA atanga test kit a thlawna dawnte chu tangkai taka hman a nih ngei a beisei thu a sawi a. Cancer dona kawnga hmalak pawimawh a nih thu sawiin, Mizoram mipuite hrisel nan theihtawp chhuah zel a tum thu a sawi a ni.

Cancer Screening Test Kit hrang hrang lo thlengte hi thin cancer vei leh vei loh screening tihna Alpha Feto Protein test kit 975, rilpui cancer vei leh vei loh screening tihna Carcinoembryotic Antigen test kit 950 leh Fecal Occult Blood test kit 975 bakah prostate cancer vei leh vei loh screening tihna Prostrate Specific Antigen test kit 975 te a ni a. A vaiin test kit 3875 a lo thleng a ni.

<><><>

HOME MINISTER

Assembly Session neih laiah nimin khan halpuah leh halmawi khapna tur 'The Mizoram Regulation of Fireworks Bill, 2026' chu pawm a ni.

Home Minister Pu F. Sapdanga put luh 'The Mizoram Regulation of Fireworks Bill, 2026' hi sawi ho a nih hnuah tlema tih danglam a nih hnuin pawm a ni a, dan bawhchhia te chu Jail tantir lam aiin pawisa in chawitira inhremna lam a tam zawk dawn niin Home Minister chuan a sawi.

Pu K. Sapdanga chuan, halpuah leh halmawi chu boruak ti chhetu a nih thu a sawi a, Mizoram sorkar pawhin hun pui - Krismas leh kumthar kum 2008 atanga khap a lo nih tawh thui sawiin, tlawmngai pawl hrang hrangte pawhin khap an duh a ti a. Sorkarin halpuah leh halmawi khapna dan mumal tak a neih loh avangin CRPC leh BNSS hnuayah district magistrate-ten khapna thupek an chhuah thin a, dan kengkawh kawngah leh thil tisualtu hremnaah dukhawp lohna a awm thin niin a sawi bawk a ni.

<><><>

SESSION- SCHOOL PROVINCIALISE

School Education Minister Dr Vanlalhlalan school hrang hrang dinhmun siam kawngah hmalak zui zel a ni a ti a, Cabinet a pharh a nih hnuah ngaihtuahna sen mek a ni a ti.

Nimin session-a member hrang hrangte zawhna chhangin Dr Vanlalhlana chuan school dinhmun hrang hrang siam kawngah hma an lak laiin thenkhat chu zirlai zaa 20 em pawh pass pui theilo, school building pawh nei lo, zirlai pawh neilo te chu sorkara lakluh an ba em tih an ngaihtuah a ti a, hetihlai hian school thenkhat te erawh tehna hrang hrang hmanga teh mek a ni a ti.

Sorkar kaltain private school/Adhoc aided leh a dangte provincialised tura a lo tih tawh zingah - Higher Secondary School 12, High School 34 leh Elementary School 5 provincialise an nih tawh thu sawiin School provincialise na atana sorkarin tehfung hrang hrang a hman te a tarlang a, School provincialise tawh te bak pawh provincialise leh tumna a awm a ni a ti.

<><><>

PINEAPPLE

Khawzawl District a awm Sialhawk khua chuan tunlai hian Lakhuihthei an hralh chhuak mek a, kuminah hian Lakhuihthei hi Quintals 8000 vel an hralh tawh a ni.

Sialhawk khuaah hian kuminah hian chungkaw 250 velin Lakhuihthei hi an ching a. Tunlai hian MIFCO-ah a hmunah Lakhuihthei Kg. 1 Rs. 18/- a an hralh mek bakah kharchhawngin an huanah a hmunah Kg. 1 Rs.15/- in an laksak mek bawk a ni.

<><><>

AGRI MINISTER :

Agriculture & Farmers' Welfare Minister Pu PC Vanlalruata'n School of Agricultural Sciences (SAS), Hnahthiala Instructor te teaching allowance (training allowance) tur chungchang Finance department-ah vawihnih thlen a nih tawh thu leh Finance department chuan sorkarin Pay Commission a din huna ngaihtuah tura a rel thu a sawi.

Assembly session nimina neiha zawhna chhangin he thu hi Agriculture & Farmers' Welfare Minister chuan a sawi a. SAS, Hnahthiala Instructor te teaching

allowance (training allowance) tur chungchang chu Subject Committee-III duh dan anga Finance Dept-a thlen a nih thu a sawi bawk.

Agriculture Minister chuan SAS, Hnahthialah hian IT-ah KVK Hnahthial atangin Computer Programmer-in class a pek thin thu leh honorarium pek a nih loh thu pawh a sawi a. Hei hi Director leh Senior Scientist & Head, KVK Hnahthial ten an ruahman anga kalpui a nih thu a sawi bawk a ni..

<><><>

BANA KAIH PROJECT

Assembly Session kal mekah Ṭawi Bialtu MLA Prof. Lalnilawma chuan a bial chhunga “Artuia Intodelhna tur Bana Kaih Project” kalpui mek atanga, a bial mipuite thar artui chu nimin khan MLA te a thartem a ni.

He hmalakna hi Prof. Lalnilawma’n a MLA fund hmanga a kalpui niin, he project hnuaia beneficiary te chu MLA fund kaltlangin Ar In sakna tur Rangva pek an ni a. Ar note man zaa 75 chu MLA Fund atangin pek an ni a, zaa 25 chu beneficiary ten an tum thung a. Ar chaw man chu thla 5 chhung atan zaa 75 chu MLA Fund atanga pek chhoh mek zel a ni bawk.

Tunah hian Ṭawi Bial chhunga he project beneficiary te hian an artui tharchhuahte an hralh chhuak ṭan mek a ni.

<><><>

CALLING ATTENTION MOTION

Eptu member, East Tuipui bialtu Pu Ramthanmawia'n Electric smart meter chhui chian ngai nia a hriat chungchangah nimin khan sessionah a pu lut.

Pu Ramthanmawia chuan, mi tamtak manganna smart meter hi ram hnuk khawih thil leh chhungkaw tin nghawng a ni a ti, sorkar laipuiin electric pekchhuahna tih changkanna RDSS scheme a tlangzarh hnua h ramchhungah smart meter hman tur tih a ni a, nikum atang khan Mizoramah Sapnam Global Infra Project Ltd ten Mizoramah smart meter vuah hna an thawk tan a, kumin kumtir atangin smart meter consumer te chu smart reading bill thar pekchhuah tan an ni a, chu bill thar chu mi tamtak phurrit leh manganna a lo ni ta a, a let thum a let li lai te in bill hi a pung a, heti em em a bill pung chak hi mipuite rawkna a ni a ti.

Pu Ramthanmawia chuan hetiang a bill sang chak em em hi enfiaha siamtha leh lova sorkarin mipuite a hmanluih tir zel anih chuan buaina leh harsatna nasa tak a hring chhuak thei hial ang tih a hlawuhawm a ni a ti. Eng chhit man sorkarin a tisang lo a tih thin chu a ru kin a tisang reng a ni zawk em tih chu a zawhna a ni a, chhui ngei a enfiah ni se a duh tih a sawi a ni.

Smart Meter hman chungchang hi chhangin House Leader Chief Minister Pu Lalduhoma chuan sorkar laipui thuchhuak angin, tih ngei ngei tur a ni a, bill san theihna chhan hrang hrang hi a awm a, meter hman lai dik taw lo a tam a, smart meter ah hian bill dik tak siam anih tak avangin a lo sang thei a ni a ti a, smart meter vuah hun a laklawh avanga bill sang emaw kalsual te a awm thei bawk a, hengte hi thuneitute hnenah a thlen theih a ni a ti. Electric Dept atanga phalna la hmasa lova mahni a lo la te pawh a nghawng thei bawk a, chuvang chuan meter khawih chinpen thlengin a hmuh avangin, bill a tisang thei a ni a ti bawk.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BJP SECRETARY MEETS UNION MINISTER

BJP Mizoram State General Secretary Pu Delson Notlia chuan nimin khan Union Minister, Ministry of Road Transport & Highways changtu Nitin Gadkari chu a chenna inah a kawm.

Pu Delson Notlia hian Nitin Gadkari hnenah hian Mizoram State hmasawwna tur atana thil hrang hrang tun hma lama an lo thlen tawhte a bawhzui a. Mizoram chhung hmun hrang hranga kawng chhia te, Mizoram chhunga National Highways upgrade ngai te, bridge infrastructure leh kawng tlo zawka siamna tur chungchang te Union Minister hi a sawi pui a, Kaladan Multi Modal Transit Transport Project-a, Lawngtlai Land-Owners Association buaina te, Upgradation & Widening of NH 502 Zero point to Siaha town te leh Amotlah to Mamte kawng siam a pawimawh zia te a thlen bawkin State-in proposal an siam huna pawmsak ngei turin Union Minister Pu Nitin Gadkari chu a ngen nghal bawk a ni.

Union Minister Nitin Gadkari chuan theihtâwp chhuaha tihhlawhtlin ngei a tum thu a lo hrilhin hmarchhak State hmasawwna chu ngaih pawimawh a nih thu a lo hrilh bawk a ni.

<><><>

CSIR

Council of Scientific and Industrial Research-National Aerospace Laboratories(CSIR-NAL) chuan tualchhung siam chi micro leh small gas turbine engine chi thum a tlangzarh. Heng engine te hi NJ-05,NJ-50 leh NJ-100 te an ni a. Heng engine te hi ralthuam lama thiamna mamawh chi hrang hrang phuhrukna kawng khat anih thu Defence Ministry chuan a sawi a. Mihring khalh ngai lo thlawhna te chi ahte, drone lo bei tur leh missile te chi ah te tangkai taka hman tur anih thu a tarlang bawk a ni.

<><><>

UPI

Vawiin Unified Payment Interface (UPI) kum 10 tlinna puala a thuchahah Prime Minister Narendra Modia chuan UPI chu India tana khawl kaltlanga sum chetvelnaah bung thar ropui tak kaina a ni a ti. Social Media ah he thu hi tarlangin Pu Modia chuan ramchhung mipuite chu UPI avanga awlsamna an neih te tarlang ve tura sawmin India mipuite tana thil chhuanawm tak anih thu a sawi. UPI hi kum 2016 vawiin angah khan hawn niin ramchhunga digital payment lamah nasa takin hmasawwn a thlen a. Khawvel huap pawha ngaihven leh fak hlawh a ni a. TRunah hian hian ram 11 ah hman ve a ni tawh a. UPI kaltlanga sum chevel hi nasa takin a thang a. Kum 2016-27 ah cheng vaibelchhe 1.78 atangin kum 2025-26 ah chuan cheng vaibelchhe sing 2 sang li leh 162 chuang hu a che tawh a ni.